

## Allannguutissatut siunnersuut

uunga

**Uunga siunnersuut: Najukkani aatsitassanut tunngasunik suliaqarnerit pillugit Inatsisartut inatsisaat**

Pingajussaanneerneqarnissaanut Naalakkersuisunit saqqummiunneqartoq:

## § 5-imut

1. § 5, imm. 3, imatut oqaasertalerneqarpoq:

” *Imm. 3.* Aalajangersimasumik najugaqartoq paasineqassaaq, inuk ukiuni siuliini 5-ini Kalaallit Nunaanni aalajangersimasumik najugaqarsimasoq aammalu Kalaallit Nunaannut tamakkiisumik akileraartussaataasimasoq, taamaattoq takuuk § 7, imm. 5.”

## § 6-imut

2. § 6, imm. 1, imatut oqaasertalerneqarpoq:

” Ingerlatassani kapitali manna malillugu suliarineqartuni, avatangiisinik innarlitsaaliuineq pillugu Inatsisartut inatsisaanni avatangiisinik innarlitsaaliuinermit maleruagassat aamma pinngortitamik illersuineq pillugu Inatsisartut inatsisaanni pinngortitamik illersuinissamut maleruagassat atuuttut nalinginnaasut, malinneqartussaapput.”

## Allannguutissatut siunnersuummut nassuiaatit

**Nassuiaatit nalinginnaasut**

Allannguutissatut siunnersuummi siunertaavoq allannguutit, najukkani aatsitassanut tunngasunik suliaqarnerit pillugit Inatsisartut inatsisaannut siunnersuutip pingajussaanneerneqarnissaanut Inuussutissarsiornermit Aatsitassanullu Ataatsimiititaliamit ataatsimiititaliap isumaliutissiissutaani siunnersuutigineqartut aammalu allannguutissiut Nunalerinermit, Imminut Pilersornermit, Nukissiutinut Avatangiisinullu Naalakkersuisoqarfimmit kissaatigineqartoq, ilanngunneqarnissaat.

**Allannguutissatut siunnersuummi aalajangersakkanut ataasiakkaanut nassuiaatit**

## Nr. 1-imut

Siunnersuutigineqarpoq, ukiuni siuliini 5-ini Kalaallit Nunaanni aalajangersimasumik najugaqarsimanissaq tamakkiisumillu akileraartussaataasimanissaq pillugit piumasaqaatip saneqqunneqarnissaanut immikkut ittumik akuersissuteqarnissamut Naalakkersuisut periarfissaqarnerat pillugu, siunnersuummi § 7, imm. 5-imut innersuussut, ilanngunneqassasoq.

Inuit Kalaallit Nunaannut atassuteqartut, ukiut siuliisa 5-it ingerlaneranni piffissami sivikinnerusumi sivilisunerusumiluunniit nunani allaniissimasut, inuit Kalaallit Nunaannut atassuteqartut allat assigalugit aatsitassanik piaanissamut taamaaqataanik periarfissaqarnissaat, qulakkeerniarlugu innersuussut ilanngunneqarpoq.

## Nr. 2-mut

Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmit kissaateqarnek malillugu, inatsisip taassuma atuunera erseqqissarniarlugu, pinngortitamik illersuineq pillugu Inatsisartut inatsisaannut innersuussut ilanngunneqarpoq. Taamaattoq tamanna isumaqanngitsoq inatsisit aalajangersakkami taaneqanngitsut atuutinngitsut, erseqqissassallugu pingaaruteqarpoq. Siunnersuummi kapitali 2 malillugu ingerlatassat tamatumunnga akuersissummik peqarani suliarineqartut, inatsisit allat tamaasa ataqqillugit suliarineqassapput, takuuk siunnersuummi § 7, imm. 1.